

rianum, ad æstuarium *Deve*, circiter octingentos passus infra Fanum *Cudberti*; *Salsidense*, in *Chersoneso*. à quibus autem singula hæc fundata sunt, propter Scriptorum penuriam non constat.

Incolæ sunt fortes, & bellicosi: certe in numero conflictu *Neoburnensi*, ad Tinam in Anglia, pauci equites *Gallovidiani* sub auspiciis *Patricii Makæi*, cujus filius in eo conflictu interfectus, clarissimi equites insigne suæ virtutis specimen dederunt. oblongis enim hastis ita turbaverunt hostium confertissimam aciem, ut cæteris facilem præbuerint victoriam. Olim quidem hæc gens ad alendas discordias proclivis, sed humaniori cultu, & religione expolita feritatem exuere paulatim didicit: Generosi, manu & consilio prompti, corporum morumque elegantia quoslibet facile exæquant. Plebs est corpore robusto, & ingenio non infelici.

Qui in *Moris*, hoc est, in desertis habitant, pecore alendo rem faciunt, magnos habent ovium greges; oves ibi optimi generis, & ob carnum saporem, & vellerum præstantiam. Lana hinc magna copia ad externas regiones exportatur à mercatoribus, qui non modicum inde quæstum faciunt.

Qui in *Machris*, id est locis cultis & campestribus habitant, agro colendo vitam tolerant; nec carent illi fecundis pascuis, & gregibus. nascitur ibi avena exiguo corpusculo, sed solido, unde optimam conficiunt farinam.

Equos alit *Gallovidiæ* mole quidem parvos, sed acres, & robustos, qui maximo ubique pretio vaneunt.

Familia hic illustriores, *Gordonia*, *Maxwellia*, *Maclellana*, *Macdovalla*, *Makkea*, *Maccullocha*, *Stuvarta*, *Agnea*, *Adara*. Sed cæteras antiquitate, & prisca dignitate antecunt, *Macdovalla*, *Maclellana*, *Makkea*, & *Maccullocha*. Cæteræ sunt recentiores. Floruit ibi quondam gens *Maclellana*, genere & opibus (ut testatur *Buchananus*) facile primaria, sed *Patricio*, ejus familiae principe, per *Duglassium* extincto, amici in vindictam proni, collecta suorum manu, in *Glottianos Duglassii* clientes, ferro flammaque sævierunt; deinde ob hoc tam nefarium facinus bonis fisco adjudicatis, ipsi proscripti, & solum vertere coacti, amplissimam familiam eò miseriarum redegerunt, unde nunquam penitus adhuc emerfit. Paucis autem post annis, *Patricii* filius, qui diu latebat occultus, occiso pirata *Afro*, qui infesta reddebat *Gallovidiæ* lit-

tora, in Regis gratiam, & *Bombiam* veteris patrimonii partem est restitutus.

Stinceella in *Teviotia* vetusta *Gordoniorum* sedes, unde duo fratres, alter in *Gallovidiam*, alter in *Bogiam* profecti, florentissimæ utrobique *Gordoniorum* familiae principium dederunt. Qui in *Gallovidiam* venit, apro agros vastante occiso, villa *Gordonia* & *Lacu varris* à Rege donatus, in numerosam gentem crevit. Adari è stirpe *Kildarensis* in *Hibernia* reguli creduntur oriundi.

Nobiles apud *Gallovidianos*, *Stuarius Gallovidiæ* comes, *Gordonius Kenmuriæ Vicecomes*, *Maclellanus Fani Cudberti Baro*, suæ quisque gentis ibi princeps. sunt & ibi multi equestri loco nati.

Arces illic multæ, sed omnium nuper validissima erat *Treva*, in Insula fluminis *Deve*, octo passuum millia à Fano *Cudberti* condita à *Duglassio*, qui, regnante Iacobo secundo, magnas patriæ suæ turbas dedit. Ea, in recentibus apud nos motibus, à *Maxwellii Nithii* comitis clientibus, defensa est; sed tandem dedita, fornicibus pertusis, tecto & tabulato ademptis, est reddita inutilis bello. Est & arx *Kenmuriæ*, ad lacum *Kennum*, in colliculo satis edito sita, à *Ioanne Gordonio Kenmurensis Vicecomitis* avo exstructa: ea subjectam vallem & lacum sublimis despicit. Cernuntur duæ præ cæteris validæ arces in *Rino*, *Kenmeda* in lacu Insulano à *Cassiliffæ comite*: *Sceodunum* (appellatur vulgo *Dunskey*, id est, arx alata) à *Roberti Adari* majoribus conditum in prærupto saxo ad mare. Sunt & aliæ, puta *Crugultona*, munitissimum olim præsidium ad æstuarium *Creæ*, *Glastonensis*, *Garlicensis*, *Clarensis*, *Cudbertana*, *Cardanesia*, & *Ruscovensis*, præter multa insignia ædificia.

Lacus in *Gallovidiæ* inferiori, *Caloverca*, *Multonius*, *Ritonius*, *Kennus*. In superiori *Martoniæ*, *Macrumius*, *Longocastrius*, *Insulanus*, *Nevius*. Sylvæ quæ hanc regionem amenam reddunt, sunt *Kenmurensis*, *Greenis*, & *Garlicensis*.

Qui prælia hic commissa scire desiderat, is consulat rerum *Scoticarum* historias à *Buchanano* & *Boëthio* conscriptas. Est, ut in verba paucissima conferam, *Gallovidiæ* (etsi apud regionis ignaros nonnunquam male audiat)

*Terra suis contenta bonis, non indiga mercis Externa,
Forte hic multa luxuria, nihil tamen nature deest.*

In nulla *Scotiæ* parte lanæ tam præstantes, nusquam in *Scotia* præstantiores equi, sed minoris staturæ, quos *Galloway-nages* vocant. Ita ut Angli omnes equos bonos *Galloways* vocent.